



SAMOSTALNI SINDIKAT SLUŽBENIKA
ORGANA UPRAVE I SUDSKE VLASTI U FBiH
("Sl.novine FBiH" br. 54/2001 i 57/2003)

Centralni odbor Samostalnog sindikata službenika organa uprave i sudske vlasti u FBiH u skladu sa članom 128. Zakona o radu ("Sl.novine FBiH" br. 43/99 i 32/2000) i člana 50. Kolektivnog ugovora za službenike organa uprave i sudske vlasti u FBiH, ("Sl.novine FBiH" 23/00 i 50/00), na sjednici održanoj dana, 10.11.2001. godine, usvojio je

P R A V I L A
o organizovanju i vođenju štrajka
Samostalnog sindikata službenika organa uprave i sudske vlasti u FBiH

I - OPĆE ODREDBE

Član 1.

Ovim pravilima utvrđuju se postupak i nadležnost pojedinih organa u vođenju štrajka, način obrazovanja štrajkačkih odbora, rad štrajkačkih odbora, prava, obaveze i odgovornosti organa Sindikata u toku vođenja štrajka, način vođenja pregovora i završetak štrajka.

Član 2.

Sindikato organizuje štrajk radi zaštite i ostvarivanja ekonomskih i socijalnih prava i interesa svojih članova.

Član 3.

Odluku o organizovanju štrajka službenika i namještenika u organima uprave i sudske vlasti i drugim institucijama, čiji su zaposleni članovi Sindikata, donosi Centralni odbor Samostalnog sindikata službenika organa uprave i sudske vlasti u FBiH, na način i u postupku utvrđenim Statutom.

Odlukom o organizovanju štrajka formulišu se ciljevi štrajka, utvrđuju zahtjevi prema poslodavcu, određuju se zadaci svih organa u vođenju štrajka, način obrazovanja štrajkačkih odbora, određuje datum početka i završetka štrajka, kao i druga pitanja koja nisu utvrđena zakonom, Kolektivnim ugovorom i ovim pravilima.

Član 4.

Ako se štrajk organizuje za sve službenike i namještenike u organima uprave i sudske vlasti u FBiH, onda se takav štrajk označava kao generalni štrajk u organima uprave i sudskoj vlasti u FBiH, (u daljem tekstu: generalni štrajk).

Generalnim štrajkom rukovodi Izvršni savjet Centralnog odbora koji može formirati i štrajkačke odbore na nivou koordinacionih odbora, odnosno sindikalnih organizacija (u daljem tekstu: Centralni štrajkački odbor).

Ako se štrajk organizuje u dvije ili više institucija, odnosno sindikalnih organizacija, štrajkom rukovodi štrajkački odbor kojeg imenuje Koordinacioni odbor (u daljem tekstu: Koordinacioni štrajkački odbor) i u kojem mora biti po jedan predstavnik iz svakog sindikalnog odbora organizacije čiji članovi učestvuju u štrajku, a Koordinacioni štrajkački odbor može obrazovati i štrajkačke odbore u svim sindikalnim organizacijama koji će brojati najmanje tri člana iz sindikalnog odbora.

Štrajkačkim odborom rukovodi predsjednik Koordinacionog odbora (u daljem tekstu: Koordinacionog štrajkačkog odbora).

Ukoliko se štrajk organizuje u jednoj sindikalnoj organizaciji, štrajkom rukovodi štrajkački odbor koji se sastoji od tri člana sindikalnog odbora na čelu sa predsjednikom odbora (u daljem tekstu: štrajkački odbor).

O organizovanju štrajka na svim nivoima odlučuje Centralni odbor u skladu sa članom 3. stav 1. ovih pravila, a organi Sindikata u organizovanju i vođenju štrajka u svemu su dužni pridržavati se zakona, Kolektivnog ugovora, ovih pravila i Odluke o štrajku.

II - POSEBNE ODREDBE

Član 5.

Štrajkački odbor je dužan rukovoditelju organa dostaviti odluku o štrajku sa jasno istaknutim zahtjevima, koji se žele ostvariti štrajkom i kopiju ovih pravila i to najkasnije u roku od 7 (sedam) dana prije početka štrajka.

Član 6.

Zahtjevi iz odluke o organizovanju štrajka, dostavljeni na način utvrđen u prethodnom članu, moraju biti jasno i nedvosmisleno formulisani.

Odluka o štrajku i Pravila štrajka, moraju se na odgovarajući način oglasiti u zgradama organa, odnosno institucija u kojima se odvija štrajk, po mogućnosti na oglasnoj tabli.

Član 7.

Ako se organizuje generalni štrajk, odluku i pismene zahtjeve Sindikata, koje je formulisao Centralni odbor, Izvršni savjet Centralnog odbora dostavit će slijedećim poslodavcima:

- u općinama, općinskom načelniku,
- u sudovima i tužilaštvima, predsjedniku suda, odnosno tužiocu,
- u kazneno-popravnim ustanovama – zavodima, federalnom ministru pravde i direktoru zavoda,
- u kantonalnim organima uprave, premijeru vlade kantona i kantonalnom ministru pravde,
- u federalnim organima uprave, premijeru Federacije BiH i federalnom ministru pravde,
- u federalnim fondovima, zavodima, odnosno javnim ustanovama (čiji su zaposlenici članovi Samostalnog sindikata), akti iz ovog člana dostavljaju se predsjedniku upravnog odbora, generalnom direktoru fonda, zavoda, odnosno javne ustanove i resornom ministru u Vladi FBiH.

Član 8.

Kada se organizuje generalni štrajk u svim sindikalnim organizacijama obrazuju se štrajkački odbori na način i u postupku utvrđenom u članu 4. st. 2. i 3. ovih pravila.

U rukovođenju štrajkom Centralni štrajkački odbor rukovodi radom štrajkačkih odbora u svim institucijama, a njegove smjernice i odluke su obavezujuće za sve učesnike u štrajku.

Radom štrajkačkih odbora na nivou koordinacionih odbora rukovodi Koordinacioni štrajkački odbor.

Član 9.

Štrajk može započeti samo ukoliko Sindikat i organ nadležan za rješavanje zahtjeva službenika, članova Sindikata, u prethodnim mirovnim pregovorima nisu uspjeli riješiti zahtjev službenika, zbog kojih se štrajk organizuje.

Član 10.

Štrajk se organizuje u odgovarajućim prostorijama organa uprave, sudske vlasti i drugim institucijama u kojima rade učesnici štrajka i to u toku trajanja radnog dana.

U toku štrajka, okupljanja se mogu organizovati i u grupama u slobodnim salama institucija iz prethodnog člana.

Zabranjeno je okupljanje učesnika štrajka van prostorija institucija iz ovog člana, osim ako to posebnom odlukom ne odredi Centralni štrajkački odbor, odnosno Izvršni savjet Centralnog odbora.

Član 11.

U toku trajanja štrajka, članovi štrajkačkog odbora sa rukovoditeljima poslodavaca, iniciraju pregovore o zahtjevima Sindikata i razlozima organizovanja štrajka, a sve u cilju postizanja očekivanih rezultata u realizaciji postavljenih zahtjeva.

Član 12.

O postavljenim zahtjevima vode se pregovori za sporazumno rješavanje nastalog spora sa rukovoditeljima organa uprave, odnosno predstavnicima Vlade iz člana 6. ovih pravila.

Član 13.

U vođenju pregovora štrajkački odbori će se pridržavati postavljenih zahtjeva, a odstupanja od zahtjeva se mogu vršiti samo uz odobrenje Centralnog štrajkačkog odbora, odnosno Izvršnog savjeta Centralnog odbora.

O postignutim dogovorima o realizaciji zahtjeva sačinjit će se pismeni protokol ili sporazum u kojem će se jasno utvrditi koji su zahtjevi prihvaćeni, odnosno usaglašeni način i rok njihovog izvršenja i posljedice neizvršenja dogovorenih obaveza u realizaciji zahtjeva postavljenih u toku štrajka.

Pismeni protokol ili sporazum, u ime štrajkačkog odbora, potpisuje predsjednik štrajkačkog odbora.

Član 14.

Sva okupljanja službenika za vrijeme štrajka treba da budu organizovana i dostojanstvena, a na skupovima se mogu pozvati i predstavnici organa kojim je upućen zahtjev, s kojima će se voditi ravnopravan razgovor o postavljenim zahtjevima.

Član 15.

U sindikalnim organizacijama službenika i namještenika kazneno popravni ustanova, sudske policije, carine i službenika i namještenika organa unutrašnjih poslova – policije, obrazuje se štrajkački odbor koji će organizovati okupljanje službenika koji rade na administrativno tehničkim poslovima (daktilografi, službenici, pisarnice, finansijski službenici i sl.), a službenici, policajci, stražari, vaspitači i druga službena lica koji nisu na poslu, odnosno imaju slobodan dan, mogu solidarno pristupiti organizovanom sastanku i voditi razgovore o zahtjevima koji su upućeni nadležnim organima.

Član 16.

Svi štrajkački odbori dužni su da u svakom organu uprave, upravnoj organizaciji, stručnoj ili zajedničkoj službi izvršnih organa, skupštine ili organa uprave, kazneno-popravnoj ustanovi, i dr., obezbijede funkcionisanje osnovnih funkcija organa (obezbjeđenja objekata, rad centra za obavještenje, prijemnih kancelarija, šaltera za stranke, po jedan radnik u svakom daktilo-birou i sl.).

Član 17.

U sudovima i tužilaštvima štrajkački odbor će obezbijediti da nesmetano funkcioniše obezbjeđenje zgrade i sudske policije, prijemna pisarnica, daktilograf kod dežurnog sudije i tužioca i dežurni kurir.

Član 18.

Štrajkački odbor će o funkcionisanju poslova institucija iz članova 15, 16. i 17. donijeti odluku u skladu sa postignutim dogovorom sa rukovoditeljem organa iz člana 7. ovih pravila, o poslovima i pojedincima koji će obavljati te poslove u toku trajanja štrajka.

Ukoliko rukovoditelj organa iz prethodnog stava ne postigne dogovor sa štrajkačkim odborom ili ne želi da to učini, štrajkački odbor će donijeti odluku i utvrditi neophodne poslove i izvršiće za obavljanje tih poslova za vrijeme trajanja štrajka, a u skladu sa ovim pravilima.

Član 19.

Nakon utvrđivanja poslova koji se neće prekidati za vrijeme štrajka, štrajkački odbor najavljuje održavanje štrajka.

III – ŠTRAJK OPOMENE

Član 19a.

Sindikalne organizacije, radi zaštite i ostvarivanja ekonomskih i socijalnih prava i interesa, mogu organizovati štrajk opomene u trajanju dva sata dnevno, a na osnovu odluke koju donosi Sindikalni odbor, ukoliko se radi o jednoj sindikalnoj organizaciji, odnosno nadležni koordinacioni odbor, ukoliko se radi o dvije ili više sindikalnih organizacija.

Štrajk opomene može trajati onoliko dugo koliko je potrebno da se ostvari mirenje i dogovorno rješavanje nastalog spora, a najduže 30 dana, nakon čega se štrajk opomene obustavlja ili nastavlja kao štrajk, za što je potrebno obezbijediti odgovarajuću odluku nadležnog organa sindikata o organizovanju štrajka.

Pri organizovanju i vođenju štrajka opomene neće se primjenjivati Pravila o organizovanju i vođenju štrajka Samostalnog sindikata službenika organa uprave i sudske vlasti u FBiH, osim člana 18.

Član 19b.

Štrajkački odbor dužan je rukovoditelju organa, odnosno predstavnicima vlasti i nadležnim resornim ministrima, dostaviti odluku o štrajku opomene sa jasno istaknutim zahtjevima koji se žele ostvariti štrajkom opomene, sa pozivom za prethodne mirovne pregovore i to najkasnije u roku od 7 dana prije početka štrajka opomene.

Odluka o štrajku opomene mora se na odgovarajući način oglasiti u zgradama organa, odnosno institucija u kojima se odvija štrajk opomene.”

IV - ZAVRŠNE ODREDBE

Član 20.

Svi štrajkački odbori u toku trajanja štrajka su dužni da redovno kontaktiraju sa centralnim štrajkačkim odborom, odnosno Koordinacionim štrajkačkim odborom, i to telefonom ili faksom koji će se naznačiti u odluci o organizovanju štrajka.

Predsjednici štrajkačkih odbora na svim nivoima, odgovorni su za zakonitost u toku vođenja štrajka, a pitanja koja se budu pojavila kao sporna, rješava štrajkački odbor po smjernicama centralnog štrajkačkog odbora, odnosno Izvršnog savjeta Centralnog odbora.

Član 21.

Odluku o prekidu, odnosno završetku štrajka, donosi Centralni štrajkački odbor ako se vodi generalni štrajk, a odluku o prekidu štrajka na nivou dvije ili više sindikalnih organizacija, odnosno jedne sindikalne organizacije, donosi Štrajkački odbor utvrđen ovim pravilima.

Član 22.

Sa odlukom o prekidu li završetku štrajka i postignutim rezultatima štrajka upoznaju se svi učesnici štrajka na odgovarajući način (putem oglasne table i sl.).

Član 23.

Ova pravila stupaju na snagu narednog dana od dana objavljivanja u Službenim novinama Federacije BiH.

**Predsjednik
Nihad Guso**